

Na osnovu člana 16. stav 4. Zakona o Vladi Zeničko-dobojskog kantona-Prečišćen tekst („Službene novine Zeničko-dobojskog kantona“, broj: 7/10), na prijedlog Ministarstva unutrašnjih poslova, Vlada Zeničko-dobojskog kantona, na 40. sjednici, održanoj dana 28.01.2016. godine, donosi

ZAKLJUČAK

I.

Prihvata se Informacija o nelegalnoj eksploataciji uglja.

II.

Informacija iz tačke I. sastavni je dio ovog zaključka.

III.

Zadužuju se Ministarstvo unutrašnjih poslova, Ministarstvo za privredu i Kantonalna uprava za inspekcijske poslove da preduzmu mjere i radnje iz svoje nadležnosti.

IV.

Zaključak stupa na snagu danom donošenja.

PREMIJER

Broj: 02-_____/16.
Datum, 28.01.2016. godine
Zenica

Miralem Galijašević

DOSTAVLJENO:

1x Ministarstvo unutrašnjih poslova,
1x Ministarstvo za privredu,
1x Kantonalna uprava za inspekcijske poslove,
1x a/a.

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
MINISTARSTVO UNUTRAŠNJIH POSLOVA
MINISTARSTVO UNUTARNJIH POSLOVA
Z E N I C A**

I N F O R M A C I J A
o nelegalnoj eksploataciji uglja

Zenica, januar 2016. godine

I. Uvod

U skladu sa Zaključkom Vlade Zeničko-dobojskog kantona, broj:02-04-19722/15 od 29.10.2015. godine, izvršena je detaljna analiza problematike u vezi sa nelegalnom eksploatacijom i prometom uglja na području Zeničko-dobojskog kantona.

Analizom je utvrđeno da je navedena problematika najviše izražena na području Policijskih uprava I i II, odnosno na području nadležnosti Policijskih stanica Centar, Crkvice i Kakanj, dok se Policijska stanica Breza očitovala da na teritoriji njihove nadležnosti neme nelegalnih jama iz kojih se vrši eksploatacija uglja, što je potvrđeno i od odgovornih iz Rudnika mrkog uglja Breza.

Intenziviranjem nelegalne eksploatacije povećan je broj povrijeđenih osoba, a zabilježeni su i slučajevi smrtno stradalih, uglavnom zbog nestručnog rukovanja i zastarjelih načina eksploatacije.

Uzimajući u obzir ovaj problem, Ministarstvo unutrašnjih poslova je u ranijem periodu zavelo stalnu policijski akciju pod nazivom "Ugalj", što je polučilo i određenim pozitivnim rezultatima.

II. Analiza trenutnog stanja u oblasti nelegalne eksploatacije uglja

Uvidom u stanje na terenu, utvrđeno je da je problematika nelegalne eksploatacije uglja najviše izražena na području nadležnosti Policijske stanice Kakanj. Evidentno je da je na području koje teritorijalno pokriva ova Policijska stanica u ranijem periodu postojao manji broj jama iz kojih su određena lica u manjoj mjeri nelegalno eksploatisala ugalj za lične potrebe, te jedan dio prodavala trećim licima.

U posljednjih nekoliko godina došlo je do porasta nelegalne eksploatacije uglja, kako iz postojećih, tako i iz novootvorenih tzv. "privatnih jama". U narednoj tabeli prikazani su komparativni podaci za 2014. i 2015. godinu, koji se odnose na slučajeve nelegalne eksploatacije, evidentirane od strane policijskih službenika PS Kakanj, dok je, pretpostavlja se, stvarni broj znatno veći.

Godina	Broj KD-a	Broj izvršilaca	Broj podnesenih izvještaja KT-u	Ukupno oduzeto uglja
2014.	47	51	51	135.380 kg
2015.	34	34	23 (13 u pripremi)	110.590 kg

Prema prikupljenim podacima, na području koje je pod nadležnošću PS Kakanj postoji ukupno 20 jama iz kojih se vrši nelegalna eksploatacija od strane neovlaštenih fizičkih lica, a iste se nalaze u eksploatacionom polju ZD RMU Kakanj u mjestima Vidići, Juke, Vlahovići, Govedići i Brnj.

U vezi s tim, PS Kakanj je kontinuirano pismeno obavještavala ZD RMU Kakanj radi preduzimanja mjera iz njihove nadležnosti, budući da je na nivou tog rudnika formirana komisija koja direktno radi na sprečavanju nelegalne eksploatacije uglja u ovom eksploatacionom polju.

Pored toga, policijski službenici su u više navrata od fizičkih lica oduzimali motorna vozila kojima se vršio transport nelegalno pribavljenog uglja, a protiv lica koja su neovlašteno ulazila u radilišta radi otuđenja uglja, podneseni su izvještaji o učinjenom krivičnom djelu kao i izvještaji o učinjenom prekršaju. Tokom 2014. godine oduzeta su 3, dok je u 2015. godini oduzeto 7 motornih vozila zbog isteka važnosti saobraćajne dozvole i tehničke neispravnosti, a koja su korištena kao sredstvo za otuđenje uglja, te su na osnovu sudskih rješenja ista predana na uništenje.

Takođe, iz PS Kakanj upućeno je niz informacija Federalnoj upravi za inspekcijske poslove, Kantonalnoj upravi za inspekcijske poslove i Odsjeku za inspekcije Općine Kakanj u kojima su informisani o predmetnoj problematici, te je zatraženo da poduzmu mjere iz svoje nadležnosti.

Kao odgovor na to, PS Kakanj je zaprimila informaciju Federalne uprave za inspekcijske poslove broj:16-18-2-05634/2014 od 27.11.2014. godine, kojom su obavijestili da je njihova nadležnost isključivo nadzor nad privrednim društvima koja se bave rudarskom djelatnošću, a kada je riječ o eksploataciji uglja kojom se bave fizička lica, to je isključivo nadležnost općinske, odnosno kantonalne inspekcije. Takođe, ova PS je zaprimila akt Odsjeka za inspekcije Općine Kakanj, broj: 02/6-874-1/14 od 30.12.2014. godine, gdje su se oglasili nenadležnim za navedenu problematiku. Kantonalna uprava za inspekcijske poslove je aktom, broj:18-18-08565/15-08-002 od 23.04.2015. godine odgovorila da nemaju stvarnu nadležnost u vršenju nadzora nad eksploatacijom uglja kao energetske mineralne sirovine, te da su našu informaciju uputili Federalnoj rudarskoj inspekciji (kopija akata federalne, kantonalne i općinske inspekcije nalazi se u prilogu).

Analizirajući problematiku nelegalne eksploatacije uglja na području Policijske uprave I (Zenica), utvrđeno je da na navedenom području postoji 10 jama iz kojih neovlaštena lica vrše nelegalnu eksploataciju uglja, kako sa eksploatacionih polja ZD RMU Zenica, lokacije Mošćanica i Stranjani, tako i iz "privatnih" jama na području sela Gradišće. Međutim, tokom 2014. i 2015. godine nije bilo slučajeva oduzimanja nelegalno eksploatisanog uglja, niti podnošenja izvještaja Kantonalnom tužilaštvu Zenica zbog krivičnog djela iz člana 286. KZ FBiH.

Prema raspoloživim informacijama dostavljenim sa terena, na području Zeničko-dobojskog kantona postoji ukupno 30 jama iz kojih se nelegalno eksploatiše uglj.

III. Pravni okvir i kaznene odredbe

Zakon o rudarstvu FBiH ("Službene novine FBiH", broj: 26/10), članovi 112, 113. i 114. predviđaju sankcije - novčane kazne, ali samo za prekršaje počinjene od strane privrednih društava, pravnih lica i odgovornih lica u pravnom licu, koja postupaju suprotno odredbama ovog Zakona: Sankcije za fizička lica koja vrše nelegalnu eksploataciju uglja nisu predviđena ovim Zakonom.

Krivični zakon FBiH ("Službene novine FBiH", broj; 36/03, 37/03, 21/04, 69/04, 18/05, 42/10 i 42/11), član.286. stav (1), predviđa: "Ko tuđu pokretninu oduzme drugom s ciljem da njenim prisvajanjem pribavi sebi ili drugom protupravu imovinsku korist, kaznit će se novčanom kaznom ili kaznom zatvora do tri godine".

IV. Zaključak sa prijedlogom mjera i radnji

Nakon što je ovo Ministarstvo, sa aspekta svojih nadležnosti, sačinilo analizu navedene problematike, predlažemo da svako iz svog resora djelovanja poduzme odgovarajuće aktivnosti. Mišljenja smo da je, prije svega, potrebno detaljno sagledati postojeće stanje i predlažemo sljedeće:

- Zadužiti Kantonalnu upravu za inspekcijske poslove, te Odsjek za inspekcije Općine Kakanj i Službu za inspekcijske poslove Grada Zenica, da na osnovu Informacije poduzmu mjere i radnje iz svoje nadležnosti, odnosno da se utvrdi stvarna nadležnost inspekcijskog organa u vezi sa ovom problematikom.

- Zatražiti informaciju od ZD RMU Kakanj i ZD RMU Zenica o nelegalnoj eksploataciji uglja sa eksploatacionih polja pomenutih društava, te mjerama koje poduzimaju na sprečavanju i suzbijanju nelegalne eksploatacije.

- Zadužiti Ministarstvo za privredu Zeničko-dobojskog kantona, da dostavi ovu Informaciju rudnicima mrkog uglja koji posluju na teritoriji Kantona, radi upoznavanja sa navedenom problematikom i poduzetim mjerama.

Broj: 08-02/2_____/16

Dana: 06.01.2016. godine.

MINISTAR

Nikola Arsenić